

Song Aen Gyoux Hung

两个大葫芦

□ Ouh Caijfangh cingjleix fanhoiz

Daegdaih raen Daegnysz ndaej baenzlai ngaenz dauqma, roxnyinh haengdingh mbouj dwg daegnuengx baengh guhhong ndaej, de youh miz cawjeiq rwix lo. De haep Daegnysz naeuz: “Hwk! Mwnz gungz ndaej lumj laeng duzfw nei, diuz bwn he cungj mbouj miz, gij ngaenz neix dwg caeg aeu faenh gou! Vaiqdi boiz dauq hawj gou!”

Daegnysz couh lwnh gij ngaenz daj gwnz go faexcuk doek hawj daeggo Daegdaih nyi.

Haemhde seiz gaeq haen, Daegdaih couh lumhlaep caegcaeg ganj bae diegmoh duz mahenj, siengj ngauz aeu ngaenz. Hoeng fwngz de ngamq bungq faexcuk, sawqmwh yiengj sing “gululu”, daj gwnz faexcuk loeng roengz baenzboengj rin roengzdaeuj, gaiq rin neix hung lumj gaemxgienz nei, moeb deng ndang de bae. De in ndaej hemqcakcak, de hozhwnj dangqmaz, loek go faexcuk bae lo!

Daegnysz rox le gig sim’ in, de buq faexcuk baenz diuz, san baenz aen loengz he, banhaemh cuengq youq lajcong. Ranzrongh seiz, de hwnq-daeuj yawj coh lajcong. Ndwloengz coux rim gyaeggaeq hung bae! Daegnysz angq ndaej diuq hwnjdaeuj! De gag naemj: Gou ngoenz gwn aen gyaeg he, gzyawz rom comz gij gyaeg neix roengzdaeuj caiq dawz bae gai, gij ngaenz gai gyaeg ndaej rom roengzdaeuj, doeklaeng dawz bae cawx duz vaiz ndeu dauqma.

Daegdaih raen Daegnysz mbouj ciengx gaeqmeh hix miz gyaeg gwn, couh bae cam Daegnysz. Daegnysz youh lwnh hawj Daegdaih gij gyaeg de gwn daj gyawz ndaej. Haemhde, Daegdaih couh bae caeg aeu aen

loengz Daegnysz lo. De dawz aen loengz lumj dawz aen dijbauj nei, haeujsim cuengq youq henz swiz, doeklaeng couh ninzndaek lo.

Ranz ngamq rongh, de couh ndiu lo, baez siengj daengz yaek ndaej gwn raemxdanggyaeq mizfeih lo, ndawsim de diemzsubsub. De doq iet fwngz lumh haeu ndawloengz bae aeu gyaeg. Byawz siengj daengz, ndawloengz coux rim le gij haex duzma niuneknek! Fwngz de haeu dangqmaz, de hozndat raixcaix, vut aenloengz ok bakdou bae, hwnj feiz couh coemh aenloengz bae lo.

Daegnysz roxnyinh hojsik lai, de aeu gaiq baengz he suek gij daeuh aen loengz ndei, haem youq goek bya mbanj laeng.

Ngoenz daihngieh, Daegnysz bae dieg haenx yawj. A! Gwnzmoh aen loengz maj ok go lwgyoux he! Gaeu gyoux baenz song aen gyoux hung lumj aenloz nei! Daegnysz yawj go lwgyoux youh naemj: Ndae song aen gyoux hung neix youh miz maz yungh ne? Gwn mbouj ndaej, hix gai mbouj ndaej ngaenz. Ai, daeggo cungj mbouj nyienh gou gvaq ndaej ndei, cungj haih gou, seizneix ndwenngoengz gou lumj gaxgonq nei gungzhoj. Baenzneix gou mboujyawx ndonj haeu ndaw lwgyoux bae ninz dai suenq lo. Doeklaeng, de couh youq aen gyoux he hai aen cong ndeu, doeklaeng couh ndonj haeujbae lo.

Daegdaih lau Daegnysz youh miz caizheiq ndei, geij ngoenz neix cungj raeblaeng gaenriengz Daegnysz, haetneix hix dwg yienghneix. Seizneix de raen Daegnysz yienghneix guh, de hix sikhaek ndonj haeu aen lwgyoux wng bae.

Dauq gangj, gwnzbya mbanj laeng miz aen gamj he, miz duz lingzsaenz youq ndaw. De dwg vuengzlingz, lajfwngz de miz boengj duzlingz iq. Gyoengqde daj gwnzmbwn roengzdaeuj, guenj gij saeh gwnzbiengz, ceih yak fad rwix, bang boux deng giengq deng hangz guhdaeuz.

Ngoenzneix, duz vuengzlingz raen laj bya miz song aen lwgyoux hung, noix raen neix bw! De roxnyinh geizheih, couh heuh gyoengq duzlingz iq roengz bya bae ram lwgyoux haeu ndawgamj. Vuengzlingz raen ndaw lwgyoux miz vnz, couh heuh boux he okdaeuj cam. Boux de cingq dwg Daegnysz, de couh lwnh gij saeh ginggyaq hawj vuengzlingz nyi.

Vuengzlingz siengj yaep he, naeuz: “Mwnz gwn haemz gwn hoj lai lo, baenzneix gou hawj ngaenz hawj mwnz bae cawx duzvaiz dauqma cae reih ba! Daeggo mwnz sim yak sim doeg lai lo, mboujguenj de caeuq mwnz dwg song aen lwgyoux caemh diuz gaeu he, couh mbouj hawj de dai

lo! Hoeng, de aeu deng mboengj goujcib gouj baez cijndaej!”

Daegdaih deng heuh okdaeuj, cigsoh deng mboengj goujcib gouj baez, bak de rwz de oklwd liux, daengx ndang hix mbouj miz saek giz naeng lij baenz gaiq, de yaek dai sadsad lo!

Daegnysz lumhlumh aen sim-daeuz, raen lij diuqdetdet, de goq mbouj ndaej lingx gij ngaenz vuengzlingz hawj, gipmuengz aemq Daegdaih roengz bya bae lo.

Byonghhwnz, rug Daegdaih lij diemj daengyouzhaeu. Daegdaih dauqdae ndaej ndiu gvaqdaeuj lo, raen bonjfaenh ninz youq gwnzcong, Daegnysz cingq bang de oep yw; gwnzdaiz henzcong lij miz gij raemxyw raemxdanggyaeq.

Daegdaih yawj Daegnysz baeg dangqmaz lij ciuqgoq bonjfaenh, gag siengj: Daegnysz sim baenz ndei ha, gou baenzlai baez haih de, de seizneix lij yienghneix dwgrengz bang gou goq gou, gaxgonq wnggai dingq gij vah daxboh.

Daegdaih gag naemj bae naemj dauq, fajnaj gag nding daengz goekrwz bae, de gaem fwngz daegnuengx, daejsebseb hwnjdaeuj……

Daegnuengx raen daeggo yienghneix, hix rox daeggo roxsoq lo. Daj baenzneix hwnj, song beixnuengx youh angqfwngfwng comzyouq ranz ndeu lo. Songde doxndiep doxgyaez, doxbang doxgoq, caj cungj baenzranz miz lwg le, cij vuenyungz baen ranz. (2 sat)



Aen Giuzdietloh raezrangrang con gvaq gyoengq bya sangset.

Yiz Anh ingj

Daihngiehcib Gij Yw-doj Yw Deng Ngwzdoeg Haeb

·Sawcuenhvaez Lwngvez·

Dou doeknaiq byaij deuz lo. Geij naed maknganx ndawbied, deng gou bibuengq ndaej naeng dek raemx lae, gou baez hozndat, hix-naengz cungj dauj roengz ndawmieng henzroen bae caez, dawz aen bied hoengq he maranz.

Daiq raen gou dauqma sing he hix mbouj dwen, gipmuengz daj ndaw ranzcauq dawz lwgmaenz okdaeuj hawj gou gwn.

Gou saedcaih gwn mbouj roengz, coux gvaqdaeuj cuengq youq gwnzdaiz.

“Vaiqdi gwn ha, lij ndatfwifwi ne!”

“Ahveij deng ngwzdoeg haeb lo.”

Gou gangj.

“Maz? Ahveij?”

“W!”

“Seizneix ne?”

“Gaeng youq ranz de lo, daxmeh

de bang de sup lweddoeg okdaeuj.”

“Duzyou baujyouh, Simjmehvej mingh hoj, lij coz couh deng maiq lo, Ahveij dwg gij mingh de ha.”

“De mbouj deng dai ne.” Gou haeb gaemz lwgmaenz ndeu, doq nyaij doq dap.

“Daengz ndawsuen bae ra meh mwnz dauqma, Ahbyauh, vaiqdi gwn gwq.”

“Guh maz?”

“Heuh meh mwnz bae yawjyawj Ahveij ha.”

Gij Golwngnyez Henz Dahhoengz

红水谣

□ Lanz Haijyangz Moz Beibei / 蓝海洋 莫蓓蓓

“Meh gou youh mbouj rox maz ywdoj—— deng lo, daiq, wnggai bae ra Aulungzgeiz ha, de rox baenzlawz yw ne.”

“Deng, deng, cengdi couh lumz lo, mwnz couh bang Ahveij buet bae ra Aulungzgeiz ba, deng ngwzdoeg haeb mbouj dwg gangjriu.”

“Gou doq bae.”

Gou cuengq roengz lwgmaenz, ndwn hwnjdaeuj couh buet ok bakdou bae.

“Gwn lwgmaenz le caiq bae

luba……”

Daiq youq baihlaeng hemq, gou dwg bouxhozgaenj, baez ngeix daengz couh aeu guh, baenzlawz ndaej caj daengz gwn lwgmaenz liux cij bae ne? Bulu couh yat gvaq giemxdou lo.

Gou riengjret ndonj gvaq ndoengfaexnganx, gvax gvaq geij aen ranz, gaeng muengh ndaej raen gij yiemhmbwnj sang’ vidvid mihsaenzvanz lo, gou menh roengzdaeuj doq diemheiq geij baez le, caiq laebdaeb buet. (caengz sat)